



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

Haiti nung drone agi nisung aika tepsetogo: HRW

Jaishankar-i FM tem den West Asia mangatettep indang sensak asem



VOL. XXIII ISSUE NO. 147 (ADOK 147) DIMAPUR RASEMNÜ (WEDNESDAY) METSÜREMI (MARCH) 11, 2026 ₹ 5.00

Nagaland nung dokan aser shishilembadak inyakertem jenjang tajungba akümtsü

Kohima, March 10, 2026 (TYO): NLA-i Mongulbarnü Nagaland Shops and Establishments (1st Amendment) Bill, 2025 agizükogo.

Iba ya Nagaland nung dokantem, shishilembadak aser public entertainment nung labour regulation tajungba akümtsü, mapa inyakertem tajungba anepalutsü aser inyakyim tipatemsü atema lir.

Iba Act ya Naga Hills District (Constitution of Town Committee) Rules, 1954 kübok tentetba Town Committee kübok mapa küma inyaksü aser state sorkari sangdong agüja talang tesemtem nunga benschitsü akok.

Ajisüaka iba Act ya nisung 20 mesüra teimba inyakba dokantem mesüra shishilembadak nung dang benschitsü.

Iba Act ajanga working hours, leave, wages, health and safety, aser employment conditions latettsür.

Iba Act ajanga mapa inyaker shinga anogo nung ghonda 10 tema mesüra hopta nung ghonda 48 tema meinyakdaksütsüla. Ajisüaka telatetba kar kübok overtime work melatsü akok, iba nung anogo nung ghonda 12 aser küm tesadang ka nung ghonda 144 tashi dang overtime work melatsü.

Mapa inyaker shirnok overtime inyakdir taa ordinary

rate nungi anasü agi teimba angutsü. Iba Act ajangasa workday nung anisüngsüksü mapang aser working hours lemsatsü lateta lir.

Iba Act ajangasa weekly holidays agütsür aser dokan shiai hopta nung anogo ka shibangtsü, külen commercial establishments aser entertainment establishments nung inyakertem nem hopta nung anogo ka ser tesadang kabosa sodi agütsütsü latettsür.

Mapa inyakertemi ita 12 inyakba sülen anogo 16 tashi privilege leave angutsü aser ibaji anogo 30 maximum tashi bendentsü akok.

Bill nungsa tanurtem aser tetsürtem mapa inyakdaksüba indang lateta lir. Tanurtem specified trades kar nung teyariteper ama inyakba dak alaka shishilembadak inyaktsü noktanger. Ano arishi küm 18 ser teküpokpur aonung 8:00 sülen mapa meinyakdaksütsü.

Tetsürtem mapang lemsar inyaktsü akok saka aonung inyaktsü atema tezüluba nung haihaura ayutsüla aser kiburtemi rest rooms, ladies' toilets, safety measures, CCTV surveillance aser ki tashi transportation agütsütsüla.

Iba Act ajanga shishilembadak ajak register asütsü aser ita 12 shia renewal asütsü lateta lir.

NLA-i Town and Country Planning (Fifth Amendment) Bill agizük

Kohima, March 10, 2026 (TYO): Nagaland Legislative Assembly-i Mongulbarnü Nagaland Town and Country Planning (Fifth Amendment) Bill, 2025 agizükogo.

Iba ajanga Nagaland nung urban aser peri-urban areas nung planning framework akangshitsü aser yimtsüng kettangpurtem asalentong yangluba nung shilem agitsü.

Hombarnü Chief Minister aser Urban Development in-charge Neiphu Rio-i iba Bill benoka liasü aser Mongulbarnü benoka olemteper agizükogo.

Iba ajanga Nagaland Town and Country Planning Act, 1966 tera yanglushitsü aser town planning schemes tajungba akümtsü. Iba ajanga urban local

bodies aser village authorities tsüngda amalitep tali akangshitsü.

Iba Bill nung "Town Planning Scheme" ta ser onük ka lir aser iba ya planning zone kübok tesem ka nung layout plan lir. Iba ya master plan mesüra peri-urban plan ka indang framework sasep nung yanglutsü aser land use o development koma inyaksü sayutsü.

Bill nungsa "Local Authority" ta asüba ulushir aser iba nung master plan mesüra peri-urban areas nung aliba village authorities adentsü. Iba ajanga urban planning maparen nung sobaliba rejutem dendaksütsü, talisa yimtsüngtem ajanga urban expansion nung tetsükdaksü ajuruba iba ajanga koktetsü.

Maneni, iba Bill nung

tongtipang onük kaji town planning scheme nung ali 20% nungi 30% tashi roads, schools, hospitals, parks aser tanga essential civic infrastructure atema ayutsü latettsür. Iba ajanga urban centres nung public space peria ayutsü.

State sorkari town planning scheme renemtsü temelaba agütsüba sülen ita ka tsüngda qualified officer ka shimtsüla. Iba kettangtsüri nungdakba administrative teyari agia scheme renemtsü aser mapa küma inyaksü.

Iba Bill-isa Act nung "Tribunal" melena "Appellate Authority" ta melenshir aser iba ya town planning schemes dak sendakba ken o tem kettangtsüa inyaksü atema lir.

EDTC-i department dang dumping site meshir

Dimapur, March 10, 2026 (TYO): Dimapur Municipal Council (DMC)-i tang tamshidak dumping site March 30, 2026 tashi dang amshitsü ta sangdongba atema East Dimapur Town Council (EDTC)-i tebilemstü ka lemsatepogo.

Municipal Guidelines and Solid Waste Management Rules ajanga Urban Local Body shia designated dumping mesüra waste disposal site alitsüsa ta

lateta lir saka East Dimapur Town Council nung municipal solid waste endoktsü atema designated dumping site mali. Anungji tanga tesem ka magütsü tang tebenshidak dumping site shibangra EDTC jana endokdak mali akümtsü ta EDTC-i sangdong ka nung metetdaksüogo.

Anungji EDTC-i sanitation fees saruba khen atema sota ayutsüsa akümtsü aser public asoshi sanitation services

anentsü. Külen, EDTC indang sanitation garitem majung lir anungji meta talang nung oa jana endoktsü nung timtem ajurutsü ta parnokisa ashi.

Anungji bangdak department-i iba khuret jungjunga asadangtsü aser tekaratiba nung EDTC atema dumping site ka anepalutsü mepishir. Maneni, public-ia iba tebilemstü khuret angatetsü aser amaliteptsü ayongzükter ta East Dimapur Town Council-isa metetdaksüogo.

MSMEs ajanga mapa adoker aser rongsenketzüing ainer: CM Rio

Kohima, March 10, 2026 (TYO): Micro, Small and Medium Enterprises (MSMEs) ajanga mapa adokdaksütsü nung aser rongsenketzüing renlokba nung tongti shilem agir ta Chief Minister Neiphu Rio-i ashi.

Nagaland nung Udyam portal kübok enterprises 48,600 tema register süa lir ta pai ashi.

Nagaland Legislative Assembly nung "Critical Role of MSME in improving Nagaland's Economy" onük benoka lemsatepdang Chief Minister Rio-i "March 9, 2026 tashi nung enterprises 48,655 register süa lir. Iba nungi micro enterprises 48,464 lir aser parnok teimbaka nano enterprises lir aser Rs 25 lakh teküpok ang angur" ta ashi.

"Tanüngbaji small enterprises 175 aser medium enterprises 16 lir" ta paisa shisem.

Chief Minister's Micro Finance Initiative (CMMFI) tenzüksüba sülen MSME units 777 tashi tentetba nung yaritepogo aser parnoki Rs 65.31 crore investment süogo, iba nung sorkar subsidy Rs 19.37 crore

teyari lir ta CM Rio-i ashi.

Item enterprises ajanga mapa 1,500 tema adokdaksütsü lenmang lir aser talisa ibaji transport services, retail trade, hospitality aser small manufacturing mapatem lir ta pai ashi.

Iba scheme ajanga public sen ajanga private investment aser bank financing nung shilem tajung agiba sayur, kechiyong rongsenketzüing nung 3.3% ajungket aser lanur entrepreneurship den yimtsüngtem nung rongsenketzüing maparen tenzükdaksü ta Rio-isa metetdaksü.

Tang MSME development projects 13 tashi inyakdar aser Ministry of MSME, Government of India dang additional projects 15 asoshi temelaba meshiogo.

Prime Minister's Employment Generation Programme (PMEGP) kübok 2025-26 atema alizüngji mapatong 454 lir aser iba nung bank temi mapatong 66 atema senotsü agütsüogo. Item mapatong asoshi Rs 21.78 crore

agizükogo. Tesüba küm pungu tsüngda Nagaland nung iba scheme kübok beneficiaries 3,715 yariogo ta CM Rio-i ashi.

State sorkarisa Raising and Accelerating MSME Performance (RAMP) programme inyaker. PM Vishwakarma scheme kübok artisan applications 25,000 tema aruogo aser iba ajanga traditional artisans nem training aser senotsü teyari agütsür ta paisa ashi.

Sorkari Nagaland nung weavers aser artisans yaritsü atema Yarn Bank ka lapoktsü sentong renemer. Iba ajanga jenjang dalang agi ayoktsü aser production costs ajema akümba den national aser international markets nung Nagaland sobaliba textile sector ajungkettsü ta CM Rio-isa metetdaksü.

Nagaland Skill and Entrepreneurship Development Mission (NSEDMD) kübok skill development maparen aika inyakdar aser iba ajanga Nagaland nung lanurtem asoshi mapa adoktsü ta paisa shisem.

E&S dept-i SSS Sub Scheme report 4 sayaogo



Dimapur, March 10, 2026 (TYO): Department of Economics & Statistics, Kohima Support for Statistical Strengthening (SSS) sub scheme atema State High Level Steering Committee (SHLSC) senden ka menogo.

Chief Secretary, Sentiyanger Imchen, IAS menden ser iba senden ya Conference Hall, Nagaland Civil Secretariat, Kohima nung amen.

SSS sub scheme ya central sector scheme ka lir aser Centre nungi 100% funding ngua State Statistical System tajungba akümtsü asoshi inyaker.

Iba programme ya Ministry of Statistics and Programme Implementation (MoSPI) kübok inyaker aser mapang shitak nung official statistics collection, compilation, aser dissemination tajungba akümtsü meranger.

Iba senden nung Report on Income disparity in Nagaland, 2025; Time Use Survey in Nagaland, 2025; Survey on Forest and Forest products in Nagaland, 2025 aser Study on rates and ratio used in estimation of Gross Value Added construction for Nagaland report pezü sayaogo.

Mokokchung nung National De-worming Day ayongzük



Dr Limanaro (UIP&RCH) ajanga NDD mezüngbuba round tenzüksüdüng tangokba noksa nung angur.

Dimapur, Metsüremi/March 10 (TYO): Government Middle School, A & B Sector nung 1st Round National De-worming Day munga iba sentong nung Dr Limanaro DPO (UIP&RCH) dena liasü.

Lai iba sentong nung jembidang, soil transmitted Helminths ya India nung public health asoshi tebilemsü tulu lir, kechiaser tanurtem dak mesen aliba yagi parnoki chiyongtsü achiba nung kongshir, anemia, malnourishment adokdaksür,

tekolok rajang kumdaksür aser temang ainba nunga kongshir ta ashi.

Iba tebilemsü koktettsü atema Government of India-i Anganwadi aser School tem nung National De-worming Day ya küm ana nung khen ayongzüka arishi küm ka nungi 19 tsüngta tanur deworm sütsür.

Dr Suimzenla RBSK MO ajanga iba anogomung rateta ashi aser kaketshirtem dang Albendazole mozü agütsü aser temang mürekmejua aser pei

aliba tesem temeket müreka ayutsü ajungmesoa liasü.

Arishi küm 1-19 tsüngta tanurtem nem schools aser Anganwadi centres sapang nungi Albendazole tablets dose ka-ka agütsütsü, ta lai ashi.

India nung aliba tanur ajak mesen maliba tanur kumdaksütsü mechi NDD ya amunger.

Iba sentong agiba sülen Albendazole tablets tanurtem nem agütsü aser RBSK team ajanga health screening agia liasü.

Chümoukedima DPDB senden nung district terenlok atema jembia

Dimapur, Metsüremi/March 10 (TYO): Chümoukedima District Planning and Development Board (DPDB) pur March ita atema senden Deputy Commissioner, Chümoukedima indang Conference Hall nung March 10, 2026 nü Deputy Commissioner & Vice Chairman, DPDB Chümoukedima, Polan John, NCS lenisüba kübok mena liasü.

Iba senden nung DC-i züngsemtem pelashishia agizük aser DPDB senden nung shilem tajung agütsü ayongzük.

Parnoki taoba DPDB senden nung lemtetba tem lepa reprangshi aser district dak sendakba ken o balala süoka jembia liasü.

Senden nung Chathe ayong

nung long atuba shilem kar melatsü asü tang nokdanga aliba maneni amshitsü ta department balala dang nungi telangzüba meshia liasü. Parnoki Virazouma nung Grace Family Foundation society registration atema temaba ketdangsur dangi aben.

Board züngsem temi Passport Seva Kendra Office Dimapur ta amshia aliba Chümoukedima ta melentsü onük benok aser Chümoukedima Town Cemetery inyakim indanga jembia liasü.

State sorkar aser State Bank of India tsüngta MoU zülutepba dak sendakba nung district nung financial literacy sentongtem indanga parnoki jembia liasü.

Deputy Commissioner-i POSH Act kübok department

ajanga nung Internal Complaints Committees (ICC) indang jembia aser district nung aliba office ajanga nung iba committee tentetsü ajungshia liasü.

Paisa 17 Sustainable Development Goals (SDGs) indanga tekok dang rateta ashi aser Heads of Department (HODs) ajanga dang SDG targets den lirumedema departmental action aser development plans yanglutsü totuyuba agüja liasü.

Department of Taxes tenung nung Orenponi Yanthan, Dy. Commissioner of State Taxes ajanga district nung maparen balala inyakba indang PowerPoint presentation agüja liasü.

Chümoukedima DPDB senden nung district terenlok atema jembia

Dimapur, Metsüremi/March 10 (TYO): District Level Review Committee (DLRC) pur September aser December 2025 nung combined quarter tembangba senden ka Deputy Commissioner, Kohima indang Conference Hall nung March 10, 2026 nü mena district nung banks aser financial institutions tem inyakim reprangshima liasü.

Iba senden nungya District Annual Credit Plan (ACP) 2025-26 kübok terenlok aliba, priority sectors nem sen aputsüba aser government-sponsored schemes mapa kuma inyakba asadanga liasü.

Pradhan Mantri Jeevan Jyoti Bima Yojana (PMJJBY), Pradhan Mantri Suraksha Bima Yojana (PMSBY), aser Atal Pension Yojana (APY) densema social security schemes kübok banks tem inyakima reprangshia liasü.

Kohima nung tang banks 24 lapoka lir. District Annual Credit Plan (ACP) 2025-26 kübok inyakim reprangshiba nung Agriculture sector kübok takok

anguba shilem 60.32, MSME nung shilem 104.47 aser danga Priority sectors nung shilem 15.52 lir, aser total priority sector kübok overall achievement ya shilem 80.80 aliba jangjatet.

Iba senden nung Deputy Commissioner, Kohima ajanga banks tem dang district nung Corporate Social Responsibility (CSR) inyakim indang lemsateptsü ashi.

Yamaji banks balala nungi teshimtet ketdangsur temi kakets reju nung computers aser learning equipments agütsüba, yimdak yimtsüng nung solar lighting inoktsüba, smart classroom facilities inoktsüba, shirangertem nutritional aid nungdakba yariba densema nüburtem nem teyari balala agütsüba indang lemsatepa liasü.

DC Kohima ajanga district telungzük nungi adokba rongsen nungi district nung aliba nüburtem ajangzüksüla aser dangaleni meyoktsüla, ta ashi.

Pai banks tem dang CSR inyakim yagi local development

nung indang-indanga yaritsüsa inyaktsü ajungshi aser bank branches tem dang taruba senden nung parnoki CSR inyakba osang tejangja bener arua agütsütsü shia liasü.

Kasa mapang kasa combined quarter atema District Consultative Committee (DCC) aser District Level Security Committee (DLSC) senden tema mena liasü. Iba senden nungya October 28, 2025 nung senden amendang lemtetba tem agizüka ayu.

District nung banks tem indang Credit Deposit Ration (CDR) aser December 31, 2025 tashi Annual Credit Plan (ACP) 2025-26 indanga jembia liasü.

Committee-isa government-sponsored schemes tem mapa kuma inyakba, social security scheme nung terenlok aliba, Aadhaar seeding aser financial literacy inyakim reprangshima liasü.

District Level Security Committee kübok district nung banking institutions indang security dak sendakba onüktema jembia liasü.

Finance Department ajanga DLC atema metetdaksür

Dimapur, Metsüremi/March 10 (TYO): Sorkari takok ngua Jeevan Pramaan Portal nung onboard asüba ajanga state sorkar nung pensioner ajanga dang tekeraba nung Digital Life Certificate (DLC) yanglutsü asoshi Jeevan Pramaan nung register asütsü metetdaksür, ta Finance Department sangdong ka ajanga ashi.

Jeevan Praman yagi pensioner tem Digital Life Certificate yangluteter, kong parnoki online ajanga life certificate jangjar.

Iba ya ajanga pensioner temi Pension Disbursing Agency office tonga aotsü menügdaker aser verification inyakim teyongba kumdaksür, ta sangdong ajanga ashi.

Dimapur nung entrepreneurship training ayongzük

Dimapur, Metsüremi/March 10 (TYO): Kaketshir nem STEAM (Science, Technology, Engineering, Arts and Mathematics) aser Atal Tinkering Labs aser skill labs amshia tebilemsü balala koktetba yimya angazükdaksütsü atema Seed the Future Entrepreneur Programme kübok training sentong ka Government Higher Secondary School, Purana Bazaar, Dimapur nung March 9, 2026 nü ayongzüka liasü.

Iba sentong ya La Fondation Dassault Systemes ajanga tenzüka lir senotsü teyari agüja linük tesem ajanga nung iba ya Department of School Education kübok Samagra Shiksha Nagaland ajanga mapa kuma inyakar aser Lend A Hand India nungi technical teyari agütsür.

Nagaland nung iba sentong

ya school trok (Government school asem aser Private school asem) nung mapa kuma inyakar, kong school shia nungi Classes VIII, IX aser X nungi kaketshir trok shimer.

National-level sentong nung linük tesem balala nungi kakets reju 216 dena agir aser iba nung Maharashtra nungi schools 30 aser Nagaland nungi schools trok Lend A Hand India ajanga indang-indanga yarir aser yangji kaketshir temi national level nung tokteper.

Product ideas ya Agriculture, Local Artisans aser Safety & Security amala omen nung rangloker, aser kaketshirtem dang nüburtemi timtem balala ajuruba nung solutions bener arutsü ajungmesor.

Iba sentong nung shisalen sayur ya La Fondation Dassault Systemes & Lend A Hand India nungi Shreyas Bhagwat aser Arundhati Jadhav liasü.

C-Edge College nung kaketsnang tase ka semzük



Dimapur, Metsüremi/March 10 (TYO): C-Edge College nung alizüng tasen ka tongteta North Block Building, kaketsnang tasen ka semzük aser Daycare Room ka meshiteta liasü.

Wapanginla Ao, Acting Principal and Dean of Management Studies lenisüba kübok Loggia Theatre Hall nung sentong ka agi, kong Daisy Shitio, Dean of Humanities & Social Sciences ajanga tesemdang, tesayur aser kaketshirtem pela agizükba o jembia liasü.

North Block Building ya Rev. Wati Longkumer, Special Assistant to the Area Director of American Baptist International Ministries ajanga meshitetsü aser ki o jen tasentem asoshi pai anir sarasademja liasü.

Iba sülen kaketsnang tasenba

Dr. Sunep Imchen, former director, AH & Veterinary Services, Government of Nagaland ajanga semzükja liasü.

College nung teyari mapa inyakba yariseptsü asoshi Daycare Room ka Dr. Imomanen Tzudir, Director, AH & Veterinary Services, Government of Nagaland ajanga semzükja liasü.

Tenüngsang agütsüba mapang Er. Moa Aier, President, C-Edge College ajanga iba reju ainba aser mangdang lemsatep aser item facilities ya kanga yongya aliba ka lir, kong kaketsnang tesadamba den azüngtsü takdang lir ta ashi aser faculty staff atema daycare room ka lir, kong parnok dang pei tanurtem anir arutsü ajungshi aser kaketshir atema loggia theatre hall ka lir ta ashi.



Uttarakhand kübok Dehradun nung 67buba National Uprising Day amungba mapang Tibet nungertem placard amer longkak aitba noksa nung angur.

Jaishankar-i FM tem den West Asia mangatettep indang sensak asem

New Delhi, Metsüremi/ March 10 (Agencies): External Affairs Minister S Jaishankar-i Mongolbarnü Germany External Affairs Minister Johann Wadepful den Asia anüolen tensa tamajungba küma aoba indang semsaksemogo.

US aser Israel nati Iran amakba sülen Strait of Hormuz ajanga senzusenpongtsü tasak kümogo, koba ajanga alima ajunga dangi totzü aser natural gas shilem 20 bener aoer.

"Germany FM @JoWadepful den Asia anüolen mangatettep adoker aliba indang sensaksemogo," ta Jaishankar-i X nung zülutsü.

External Affairs Minister-isa, South Korea External Affairs Minister Cho Hyun den sensaksem tajung kaogo, ta ashi. "Bilateral onüktem tejakdangi bener aotsü asoshi sensaksemogo. Iba den ano Asia anüolen mangatettep adoker aliba aser energy supply

nung tetsükdaktsü adokba indang sensaksemogo," ta pai shisem.

Jaishankar-i Asia anüolen mepetmesü adoker aliba indang Italy FM Antonio Tajani den sensak asemba sülen anogo ka lir ano lenir ana den ya sensaksemogo. Linük aika aser talisa Asia nung crude oil jenjang timba kümogo aser Hombarnü USD 115 tashi tua liasü.

South Asia nung totzü jenjang timba akümba aser electricity agi anüingba azüoktsü atema jenjang agiogo. Bangladesh, Pakistan, aser Sri Lanka nung ajak nung totzü aser electricity kümzükka ayutsü atema jenjang agiba sangdongogo.

India nunga Ato Kilonser Narendra Modi-i Mongolbarnü Petroleum Minister Hardeep Singh Puri aser External Affairs Minister S. Jaishankar na den senden mena LPG supplies indang lepareprangshitsü aser tang rara adoker aliba ajanga

tetsükdaktsü ajangshitsü aliba indang asadangtsü atema senden menogo.

Union sorkari Hombarnü domestic fuel market kümzükka ayutsü atema Essential Commodities Act (EC Act) benokogo. Petroleum Ministry-i ashiba agi, linük ajunga nung sorchiok dang amshiba gas agi manüingdaktsü atema liquefied petroleum gas (LPG) takaraba nung adokdaktsü aser LPG pool-i hydrocarbon streams tongtibangtem yoktsü asoshi refineries aser petrochemical unit tem nem tetuyuba agütsüogo.

Mongolbarnü külem sangdong ka ajanga Indian Oil Corporation Limited, Bharat Petroleum Corporation aser Hindustan Petroleum Corporation nungeri ashiba agi, LPG output timba kümdaktsü aser kidang amshitsü aser non-domestic sector tem atema peria rezünga ayutsü asoshi Ministry-i jenjang agiogo.

Aibelenba ketdangsürtem anema jenjang tesashi agitsü: CEC

Kolkata, Metsüremi/March 10 (Agencies): Chief Election Commissioner (CEC) Gyanesh Kumar-i Mongolbarnü ashiba agi, West Bengal nung assembly election agitsü atema maparen mapa shitak minyakba ngutetra sorkar ketdangsürtem anema jenjang tesashi agitsü. Paisa, Election Commission of India (ECI)-i azütokshi aser amokmerenba khenyongi magizüksü, ta shisem.

"Election inyakyim nung densema aliba ketdangsürtemi temzüng ozüng aser pool panel tetuyuba sülen anidakdaktsü ta ECI-i voter tem nem tenangzükba agütsür. Aibelenba ngutetra ECI-i ketdangsürtem anema jenjang tesashi agitsü," ta Kumar-i osangbenertem dang ashi.

Kumar lenisüba nung election commissioners Sukhbir Singh Sandhu aser Vivek Joshi nung anogo asem atema Kolkata-i oa lir. Parnoki election atema renemshiba asadangdar.

Hombar aser Mongolbarnü political party, state sorkar ketdangsürtem aser enforcement agency tem den lepareprangshiba senden aika menogo.

"Lepareprangshiba senden

amenba mapang political party tem, chief secretary-i anir state sorkar ketdangsürtem, district collector tem aser director general of police (DGP) aser police commissioner densema police ketdangsürtemi EC dang election ya amokmeren kecha makai azütokshi nungi pilaa sadem sadema agidaktsü ta tenangzükba agütsüogo," ta pai ashi.

"Ketdangsürtemi party ka mesüra nisung ka pusema inyaksangshi masütsüla. Enforcement agency tem tebandang kecha makai inyaksangshitsü aser temzüng ozüng shitak benoka inyaktü atema tetuyuba agütsüogo.

February 28 nü sayaba electoral roll nungi voter million 6.3 aginba anema West Bengal chief minister Mamata Banerjee-i mener longkak aitba mapang ka nung CEC tang Kolkata semdang. Maneni voter million trok indang kuli kakettem tang asadanga mapang lir.

Hombarnü West Bengal nung political party balala nungi lenirtemi Kolkata nung EC den ajurutepa parnok aikati taruba assembly election ya timba agia shilem ana küma lemsar agitsü mepeshia asüngdangogo.

Telangana nungi Rajya Sabha atema Singhvi & Reddy shimogo

New Delhi, Metsüremi/ March 10 (Agencies): Congress party-i tang Rajya Sabha züngsem aser senior advocate Abhishek Manu Singhvi aser taoba MLA Vem Narender Reddy na Telangana nungi taruba Rajya Sabha elections atema nominate süogo. Election ya ita tatemlen agitsü.

Council of States atema küm ana nung khen agiba election asoshi nomination ya sangdongogo, koba March 16 nü agitsü aser kasa anogo nikongtsü 5 ako nung vote azüngtsü, ta Election Commission-i metetdaktsüogo.

Congress Rajya Sabha züngsem Abhishek Manu Singhvi aser Bharat Rashtra Samithi (BRS) MP K R Suresh Reddy na kümsük tembangba sülen Telangana nungi menden ana ya April 9 nü tazüng akümtsü.

Telangana Legislative Assembly nung Congress party nungi züngsem aika lir asünung Singhvi maneni shimtsü imlar.

Congress-isa, taoba MLA aser Telangana Chief Minister Revanth Reddy adviser Vem Narender Reddy-a nominate süogo. Pa ya chief minister den kanga junga sendaktepa aliba nisung ka lir.

Rajya Sabha election atema pa shimba indang jembiba mapang Narender Reddy-i party lenirtem dang pelaba lemsatetep. X nung post ka ajanga pai Sonia Gandhi, Congress tir Mallikarjun Kharge, Lok Sabha nung Leader of Opposition Rahul Gandhi, AICC general secretary K C Venugopal, MP Priyanka Gandhi, Chief Minister Revanth Reddy, Congress in-charge Meenakshi Natarajan, Deputy Chief Minister Bhatti Vikramarka aser Telangana PCC tir Mahesh Kumar Goud aser tanga party lenirtem dang kanga pelaba lemsatetep.

April ita tazüng akümtsü aliba Rajya Sabha menden 37 rongnung Telangana nungi menden ana ya-a densema lir. Election ya Maharashtra, Odisha, Tamil Nadu, West Bengal, Assam, Bihar, Chhattisgarh, Haryana, Himachal Pradesh aser Telangana nung agitsü.

Election Commission-i election agitsüba anogo February 26 nü sangdong aser iba sülen nomination inyakyim tenzükka liasü. Nomination file asütsü asoshi tatembangbuba anogo March 5 liasü aser March 9 tashi nung nominations agintsü atema candidate tem nem temelaba agütsü.

Indian Embassy-i lisopur dang arrtsü ajanga Iran toktsür maotsü tuyu

New Delhi, Metsüremi/ March 10 (Agencies): Tehran nung Indian Embassy-i India nungertem dang mission den tongtepratep mesü Iran arrtsü adena ali lenmang ajanga maotsü asoshi tetuyuba agütsüogo.

Middle East nung mepetmesü tulu adoker aliba mapang iba tetuyuba ya agütsüogo aser embassy-i ashiba agi, India nung ketdangsürtem nungi tetuyuba tejangja agizükba sülenang

arrtsü adena aotsüla.

"India nungertem dang Iran indang arrtsü adena aotsü asoshi embassy den tongtepratep mesü shinga arrtsü leni maotsü ajungshir," ta sangdong ajanga metetdaktsü.

Embassy-isa, lisopurtem ya Iran toktsür aoba sülen tanga linüktemi mitetra parnoki teyari magütsütettsü ta shiogo.

"Nisung ka Iran litsü toktsür aoba sülen tanga linük kati mitetra Embassy-i teyari magütsütettsü ta jangja

lidaktsüner," ta kasa sangdong ajangsa metetdaktsü.

Mission-isa, India nungertem nem teyari agütsü atema parnok renema lir ta ashiba den parnok dang emergency helpline tem den tongtepratepa alitsü shiogo.

Embassy-i teyari balala atema item number; +98-9128109115, +98-9128109102, +98-9128109109 aser +98-9932179359 aser email cons.tehran@mea.gov.in ajanga tongteprateptsü lemsatetepogo.



Chikkamagaluru, Karnataka nung mapa inyakerteri truck ka nung LPG cylinder load asüba noksa nung angur. Middle East nung mepetmesü adoker aliba ajanga totzü aser gas supply nung tetsükdaktsü adokba sülen India nunga LPG aser commercial cylinder tem sen 60 aser sen 114.5 agi timba küma liasü.



TIR YIMYIM YIMOBILEM (EDITRIAL)

DIMAPUR WEDNESDAY, FEBRUARY (METSUREMI) 11, 2026

Ali nung merumerurtem

Alima ya asenoki meyanglu aser yangi tanü alima nung alir asenok nisungtem ajak ya talia teti malitsü, anungji tanü asenok akaba ali ya asen meyong amato saka shitakba nung asen meyong masü saka teyanglur Tsüngrem meyong lir. Ajisüaka, alima ya asenokiang yanglu amai asenoki ali nung kanga merumerur, iba jagi kidangertem den dena meputepteter aser külem ajangzüksüba terenlok mapatema meinyakteter. Tanü Nagaland tesem aika nung government-i terenlok mapa inyaknüaka meinyaktetba timtem ya ochimashiba tebilemsü dang masü saka asenok ali nung merumerurtemi pei külem ajangzüksü asoshi terenlok mapa inyaksü atema pei li tenla agütsütsü melen, government li atsünga agiba ajanga ajuruba timtem aser tebilemsütem lir. Aji oda, Nagaland tesem ajaklen ali kiburtemi ali tera magütsünüba agi yimkong jajatsüba lenmang sademsadema lapoktsü melen gari tila ana ta mesüiteptetsüsa timtem ajaki anogo shia ajurua alitsü. Tesüngmangtsü kaji, pei dena jajatsüba yimkong lenmang sademsadema yanglutsü asoshi government-i alimenok agütsüdi asüyonga karibo mangar aser kari jenjang saketa tur meshir. Iba ama timtem agi Nagaland nung yimkong teyari angutsü asoshi lapokba kaketreju aser mozü ki kimongtem dena tilaba-tilaba kuma aoba asenoki angur. Item ama asenoki ali nung kanga merumeruba ajanga Nagaland kanga ajangzüksü melen kanga akoksatsüba mapa kaji, Dimapur Rilway station ya linük nung Railway station tulu aser tajung rongnung ka asütsüsa senbo peria lezmüka yuja lir ser nung asenoki Railway meyong li atsünga agir meyipa magütsüetba timtem agi iba terenlok mapa ya meinyakteti anena lir. Atangji, iba ama government meyong li atsünga agidaksütsüsa aliba government-ji kangasa tashimait liasü asü (?) mesüra government nung alirtemiang yariseama agidaksüar na (?) ta kanga temulung melemer. Nagaland nungbo, kanga tezüdangtsü kaji, government nung ali anüksü tashi aser bangdak agütsür mendaksürtemiang government li atsünga agiba asenoki ngua aruogo. Iba jagiang tanü Nagaland tesem ajaklen government li agi private li kumadokogo. Item kulitem rongnung kaji, Dimapur nungsa Nagaland ajunga asoshi tayimtsü anendak ka alinung, aji meketa aliba li wazüka ayutsü melen aji anüksü yutsürtemiang anir iba liji pei meyong akümba agi Dimapur tayimtsü anendak ulushia yanglushinüyonga meyanglutet aruba tangang tanem-tanemi government-i meyipa agia aoba angur. Item timtemji asenok nübortemi dang masü saka government nung ketdangsertemi dena ali nung merumeruba ajanga, tagitsü nung aser terenlok mapatem inyaksüba nung, Nagaland tama masü saka pei tama südaktsüba agi pei meyong ali tuluba tuluba akümdang, arok meyong Nagaland meyong li ba tilaba-tilaba kuma tesem aika nung government ali dang masü saka government-a mali amato kumogo. Aji oda, government nung tuluba nungi shir asenok public rongnunga tilatiba tashi ali nung merumeruba ajanga asen lima nungbo tayimtsüsa sadema anendak maka, train station-a tuluba meyanglutet, National Highway-sa asüyonga asen lima nungsa tilaba ta asenok ajak ya sademsadema alitsü atemabo tanga lima nung oa aliang tajungba asütsüsa asenok litepdagi. Atangji, takokertembo tanga lima nunga oagi kiojen tajung yanglua yur ayongayonga litepdagi, saka asenok nübortembo auyi ponga, lishi mezüa asüyonga Nagaland nungbo Nagaland nungsa alitsü, anungji kodang Nagaland tonga tayimtsü aser train tulu marutetsüsa aser gari sadema mejajatetsüsa tashi alirtemi ali atsüngsepa agidir, asenok akhi putu nung ama tokolak nung pei khu bener tetsüng agi jajatsüsa akümtsü. Iba ama timtem anogoji majurutsüsa asenoki tang nungibo train junga marutetsüsa aser manentetsüsa ali atsünga agirtem, tayimtsü anendak ulushia meyanglutetsüsa ali mekazüa agirtem aser gari sadema mejajatetsüsa ali nung merumerurtem anema ola adoktsüla aser asenoka melenshitsüla. Aji oda, yimten yimsüsürtemia pei pei tesem nung tatishitsü tajung sayua nübortem asoshi ali wazüka ayuba aser terenlok mapatem sademsadema inyaka odaktsüba mapatem nung, ni tama masü ozü lima aser nübortem tama ta bilema inyaksüla.

OLEMSABANG

NISUNGI TSÜNGREM TEBILEMBA TONGTETSÜMAKOKER

~ M. Meren, Ex.pastor Ungma.

(Yashi adok nungi...)

Israel nunger Jeriko yimti amakdang Akani temenen menabayong tanaben Israeli Ai yimti tilaka amakdang bilema maliba nisung 30 tashi tepsetdaksü saka temenen menasang Akan, temenenbo pai mena nung tetepseter rong nung pabo maten tangarang tepsetdaksü masü no? asenok tatok meshiba aser lumiba nung Tsüngremi mebelatsüsa ali asü? Asen temang nung Wara komo tamajung tendaktsübaji telong nung koba teset lir aji agiteta meindokra tema nung mozü anüba agi kodanga wara komoji maneper, yamaji asenok tatok meshiba nung teset nung mekongshira Tsüngremi kechiba ni mesüshir ta mejashitsü no?

David chubai nüktabangta benschirang kinungbo Uriah tongpang nung asaa tepsetdaksü, Davidi iba asoshi jepa tatok meshi saka pai Uriaher kinunger dang tatok memeshi, Tsüngrem dangang meshi, asenok tanü tatok meshiba yimya tema agi dang tatok meshiba jagi Tsüngremi mebelar asütsüa akok, Tsüngremi David nem tatok agütsür tabo ashi saka temenen menaba temerenshi taa-bo par kibungi aben aji oda alima nung par kibung tansütsüka ataloka ao. Asen Aortem lumia tatok meshiba nung teset matong meshibaji anemsü tatok meshiba lir, anungji iba jagi Kibuba mebelar asü? Abrahami tarongba tenla agütsüba nung aibelen iba jagi pa dak jakzükba semchirtem ajak alar tia nung küm noklang pezü alitsü atakatem aser ibaji Ijep lima nung alar tia nung okrongseta aliba angur. Temenenbo Abrahami mena saka temerenshibo par dak jakzükba semchirtem dak ala. Tsüngrem sentong angatetsü koda tasak.

Tanü Mungdangi anir, Arogotemi anir kija taküm ajunga Lumiba nungji anemsü maten tatok meshigoma? Süra kechiba asen Tsüngrem mepelar? Nenevi yimti anogo 40 nü nung samatsü amokmeren, kechi atalok? Chubai anir süjen abener, aut mezüa anogo asem atep nung mi mabu, tzüa majen, parnoki mesüba Ak An tena lumi, Tsüngremi langzü, iba sülen yimti nung Anchanu kata mesama, asenokbo kechiba lumiba sülen takotet temulung lemtet atura lenir paikati samar? aji mebilemdanger no? asenoki tatok meshia lumi süra ne mulungjang nungi takotsüngden agiteta endokogo ma? Ta asüngdang nung koda langzüla? Mesüra nena tsüngta, mesüra nenok tsüngta lenji marutep aliba to ajak endoker salemtepaogo ma? Temulungjang nung takotsüngden shizüka meindoke anemsü lumiba agi Kibuba mebelar asü? Asen Arogotem ajak nung mizü sabang nungi tatok agüjang, tatok agüjang, temeim sayuang ta sentep shia ayimtener saka kija kija taküm nung anemsü agi sünger kecha nunga tatok ola mali, hau asü nunga? Pulpet nungi ayimtenba ya tiyazü nung ayimtener südi koda? asen molungjang nung tako tsüngden kapoka meindok lumibaji anemsü masü no? Kechiba kechi tai aser shiba tai, shirnok tai temenen yong nisung tajung ojala paikati mali? Akhan menen yong Israel nung temeranger tsükchir ajunga madak takok angur temeja nisung 30 ai yimti tila ka nem kechiba tepsetdaksü? Parnoki Alima matsüngdang maksü olura ajurugoto, Ajioda asenok amangbapurtema nisung shia temolungjang nungi takotsüngden meindoke lira aji lapoka endoker ochiba agi Kibuba dang lumitsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

MP nung tribal nisungtemi tamangba yimtsü maitsü balaka meshir



Linük census tenzüksü lia New Delhi nung tribal nisungtemi tamangba yimsü indang code balaka khanga longkak aitdang tangokba noksa nung angur.

Bhopal, Metsüremi/March 10 (Agencies): India linük kübk Madhya Pradesh nung tribal lenirtemi sorkar dang parnok maitsü wazüka ayutsü atema parnok lisopur tamangba yimsü agizüksü ayongzükba Khristan lenirtemi pela agizükogo.

Madhya Pradesh legislative assembly nung opposition lenir Umang Singhar-i Anuppur district nung March 9 nü tribal nisung 10,000 shi adenshia alidak iba takhangba ya agütsü, shirnok nüburtem terenlok maparen nung timtem ajuruba lemsateptsü asoshi adenshia liasü.

"Tribal nisungtem danga yimsü nung shilem ka ama züngshira (2027 nung agitsü aliba national census nung), komasür asen maitsü mesamai yutettsü?" ta Singhar-i asüngdang.

Tang federal sorkar indang census nung tribal nisungtem ya tamangba yimsü trok - Hindu, Muslim, Christian, Sikh, Buddhist aser Jain mesüra 'Other religions' indang general category nung ka südaksütsü shia lir.

Singhar-i federal sorkar dang tribal nisungtem parnok indang 'traditional religion' zülüoktsü asoshi census nung column balaka inokdaksüner.

Pai state nung aliba tribal nisungtem dang iba takhangba agüja President of India dangi shiti million pongu shi yoktsü ayongzüka liasü.

"Tribal nisungtem maitsü samara, meilongi parnok indang constitutional rights aser protections nunga kongshitsü," ta pai ashi.

Paisa sorkar indang sentong balala nungi tribal nisungtem agientsü mera magitsü tekumdangtsü ashi, koba kakat rejutem, sorkar mapa aser parliament aser assembly nung nübu shimtsü quotas lir.

Singhar-i akhangba ya osang tajung ka lir, ta retired Bishop Gerald Almeida of Jabalpur diocese-i ashi.

"Lisopur ya aiben Hindu nung ama züngshir, aser ibaji shidak masü. Parnok ya tribal

nisung ama maitsü amshitsüla," ta Almeida-i March 10, 2026 nü UCA News dang ashi.

Hindu yimsü akanga amshiba telok temi tribal nisungtem ya Hindu nung ama züngshir aser Khristan missionary tem parnok den meyoktepa aliba anema nokdaker aser Hindu nung sobaliba nung aibelenba ama züngshir.

Hindu nung bhekumba Bharatiya Janata Party (BJP) yagi state nung sorkar kumteta lir aser parnoki Khristanpur aser parnok indang institutions ya tribal nisungtem aser mashi-memeteter tem Khristan yimsü agizükdaksütsü asoshi inyaker ta aitsür.

India nung state ter dak tema nung anti-conversion laws tesashi amshiba rongnung Madhya Pradesh ya ka lir, kong tamangba yimsü melenba ya mapa tamajung inyakba ama kumdaksür.

"Onok asoshi tebilemstü ya tamangba yimsü melenba indang masü saka census record nung asaa onok ya Hindu nung ama züngshiba ya lir," ta

MP nung tribal kin nungi yimten yimsüsür Gulzar Singh Markam-i ashi.

"Onok yimya, sobaliba aser tamangba yimsü ya Hindu yimsü amanger dang nungi khenyongi balaka lir," ta Markam-i UCA News dang ashi.

Tamangba yimsü maitsü balaka akhangba ya tang tasen masü saka India nung tribal kin 700 dak tema aliba lisopur million 104 dak tema indang ken o lir, ta Markam-i ashi.

Tatishitsü agi, central India nung aliba Jharkhand state nung tribal nisungtemi parnoki akhi alemli nungi amshia aruba "Sarna" yimsü ya tamangba yimsü balaka ta agizükdaksütsü khanga arur.

"Linük nung nisung ajaki pei mulungba tamangba yimsü amshiteta yur, kechiba tribal nisungtem nem parnok temeden magütsür?" ta Markam-i ashi.

Madhya Pradesh nung nisung million 72 aliba nungi shilem 21 dak tema lisopur tribal nisungtem lir. Iba state nung assembly constituencies 230 aliba nungi constituency 47 tribal nisungtem asoshi yuja lir.

Kerala sorkari yijemer aser mozü achir tali adokdaksüba aitsür

Thiruvananthapuram, Metsüremi/March 10 (Agencies): Kerala nung aliba Catholic bishops temi state nung communist-i aniba sorkari yijemer aser mozü achir tali adokba nung mapa kecha meinyaker ta aitsü.

Bishop temi nüburtem dang, talisa lanur temi yi ajemba aser temesepba mozü amshiba anema ajang-ajanga nokdaksü ayongzük.

"School azüngba tetsür chanu tem temesepba mozü amshiba sang nung shidaktsür aser mapang tatsüka lir temesepba mozü shibelenba nung amshir," ta Temperance Commission of Kerala Catholic Bishops Conference nungi sangdong ka nung ashi.

Iba sangdong ka Kerala nung aliba Catholic Churches nung March 8 nü Sunday Mass mapang zünga ashi.

School 1,400 shi temesepba mozü amshiba

tesep kumdaksüogo, ta shiti nung shia liasü.

"Tsürabur temi pei tanurtem kanga anepalua mamshira, parnok tarutsü tia lendong nung lir," ta ashi.

2016 election masüadang yi ajemba aser temesepba mozü achiba azüoktsü ta nangzüka liaka state nung Left Democratic Front coalition government-i mera kecha magi, aser tangbo state nung yi ayokba tesem agi süngogo, ta bishop tem shiti nung shia liasü.

2016 küm Kerala nung bars 29 liasü, saka LDF-i küm ter yimsü asüba sülen tang state nung bars 1,000 dak tema, liquor stores 337 aser fermented palm sap ayokba toddy shops 5,071 lir.

"Sorkari nangzükba ama masü, tangbo yi ayokba dokan kanga yakyaka lapoker aser itemi ayoktsü ajungmesor. Ibai voters ashioksüba lir," ta Kerala Region Latin Catholic

ANOGO ABEN TSÜNGREM DEN

Rongsen Lemsaba

Yangi Dawidi Tsüngremi akokbatem rasaa ashir. "Na temaleni atu, nai tepuoker bener ao: Au, Kibuba Tsüngrem parnok den alitsüsa, tashi mangartem nungia agizük"(t.8). Ibai Kibuba atuba noksa lir. Tasen Lai nung ibai Efesa 4:8 nung angur.

Yisui asenok asoshi kechi inyak reprangang. Mezüngbuba, Pa asenok dang tama ao. "O Tsüngrem, na kodang ne nübur tsüngdangi ao, Na kodang azüngmeyakdak ajanga ao" (t.7). Na tanü kong lidir liang, nai dang Tsüngremi mulungba nung lira, Pa ne dang tama aotsü. Idaki Israel nung arem ajanga aoba noksa sayur. Israel nungeri parnok sasa telok kümteta aotsü Tsüngremi meimla. Aonung pai parnok mi tongshi agi ani aser anüngdang mepet tongshi agi ani. Ozüng süngdenji Tsüngrem parnok den dena aliba temaitsü liasü- parnok tejakdang ao. Pai asenok jakdang aor aser asenok menen kangki nung aben.

Tanabuba, Pa asenok temaleni atu. "Na temaleni atu" (t.18). Kibuba Yisu sentsüwangshi daki atu, aser Tebu tajichilen sentsüwangshi nung mena lir. Pa shiba takok angutsü asoshi asenok jakdang ao tang takokji lemsateptsü asoshi asenok temalen mena lir.

Tang Pa asenok rongnung alir. "Kibuba Tsüngrem parnok den alitsüsa" (t.18). Aser Pai kechi inyaker ? Pai pa purtem nem sempet agütsür. Ibai takokeri tenangzükba oset lemsaba noksa lir. Asenok koda takar! Iba asoshi asenoki Pa koda asangtsüla. Tanü nai Takoker dak temulung alemer asü?

Khrista asüba aser shia aruba ajanga, na takar kuma lir. Kangki telok Tsüngremi ne den angati lemsateper. Iba taküm nung nai tamakok angutsü menüngdak.

Council indang tatong tir Joseph Jude-i ashi.

Sorkari ozüng salaa hotels, bars aser yi ayokba dokan tem anepdang 3:00 ako tashi lapoktsü melar. Taoba mapang item ya ayatirm nung shibanga liasü, ta pai ashi.

"Sorkari nüburtem dang yi tali ajemtsü ajungshir amai ajiteter," ta pai UCA News dang ashi.

Yi aser temesepba mozü agi yamai teraksatsüba bener arua alidang arogo ola madoki malitsü, ta pai ashi.

Kerala nung tawa yijemer aser mozü amshir tali akumba osang aser data ajanga sayur.

2024 küm Kerala nung Narcotic Drugs and Psychotropic Substances Act kübok ken o 27,701 liasü, koba Punjab nung iba ama ken o 9,025 aliba dang nungi asemben agi tali lir, ta Kerala nungi Indian National Congress party nung ozüng

yanglur aser kakat zülur Sashi Tharoor-i taoba küm April ita The New Indian Express osangkaket nung article ka zülua liasü.

India nung Punjab ya temesepba mozü amshiba tiyongtsü ama akhi mapang nungi züngshir. Ajisüaka India nung temesepba mozü dak sendakba ken o ya Kerala nung timba lir, kong 2024 küm nisung 100,000 nung iba indang ken o 78 liasü aser Punjab nungbo 30 dang lir, ta Tharoor-i ashi.

Tesüiba küm pezü tsüngta Kerala nung temesepba mozü dak sendakba ken o 87,101 zülüoka liasü, koba tesüiba küm pezü dang shilem 130 agi timba alumba lir, ta pai article nung ashi.

Kerala nung nütsüng yongsük 33 million aliba nungi Hindu nung shilem 54, Muslim nung shilem 26 aser Khristanpur shilem 18 lir, ta sorkar indang data ajanga ashir.

AO OSHI ANGAZÜKDAK:

TANÜ ANGAZÜKTSÜBA OJANG



Wadang

(n) akialu aser tanga teinyaksü mapatem (task or work to be done)

* Asenok ajaki pei wadang nung temulung agütsütsüla.

Wadang

(v) süngrangtsü agi ana küma jendangba (sawn off)

* Mapa inyaksangi süng ka ana küma wadang.

OLONG PAITEP # 7440

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizingdak - (3)
- 14. Tebang nungi adokba - (3)
- 16. Süngdong tatebangliba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 7438 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
- 5. Lenti, 7. Tajangzük,
- 11. Teronem, 12. Sempa,
- 13. Jahaz.

NAI-A YA METETTER



German tsür Bettina Dorfmann-i "largest collection of Barbies" atema Guinness World Record ka yangluteta lir aser iba dak alia ano lai otsü tasen ka yangluogo.

Bettina-i Barbie dolls 18,500 bendenba atema Guinness World Record angu aser The Great Show of World Records ta ser TV series nung lai shilem agidang la tenük shibanger minute asem nung lai Barbie dolls 19 tashi jangjatetba atema alima otsü tasen ka yangluogo.

Kaziranga nung tetsür teloki Environment Protection Award angu



Guwahati, March 10, 2026

(Agencies): Kaziranga National Park nung tetsür forest personnel indang special team "Banadurga" nem Mohan Sharma Sadichha Environment Protection Award 2026 agütsügo.

International Women's Day amungdang Kaziranga National Park and Tiger Reserve kettangpurtemi iba osang

metetdakja liasü.

Banadurga team nung trained women forest guards dena lir aser parnoki anogoshi Kaziranga nung arem shiruru aser tzümpung kümzüka ayuba nung tongti shilem agir.

Iba tetsür teloki forest patrols, anti-poaching operations, surveillance, aser wildlife movement monitoring maparen balala inyaker.

Mohan Sharma Sadichha Environment Protection Award 2026 ajanga Banadurga team-i tasü itta mapa inyakba, tashi angaba aser bendanga agütsüba ajiteteter ta kettangsurtemi ashi.

Kaziranga National Park and Tiger Reserve kettangpurtemisa Banadurga team aser parnok den yaritepa personnel ajak nem tenüngsang agütsüba metetdaksügo.

North East film festival atema entries meshir

Imphal, March 10, 2026

(Agencies): 3 buba North East India Film Festival (NEIFF) nung shilem aginürtemi March 19, 2026 tashi nung tenüng agütsütsü akok.

North-east state 8 nungi filmmakers-i March 19 tashi nung entries agütsütettsü ta Imphal nung tayongertemi metetdaksü.

Iba benjung ya March 21 aser 22 anogotem Tantha Polis Cinema, Lamphel nung amungtsü. January 1 aser December 31, 2025 tsüngda Central Board of Film Certification ajanga produced

asertified asüba feature non-feature films adentsü.

Iba benjung atema entry fee kecha mali aser Arunachal Pradesh, Assam, Meghalaya, Mizoram, Nagaland, Sikkim o Tripura nungi independent aser first-time filmmakers ajungmesotsü atema lir.

Iba benjung nung best feature film, best non-feature film, best director, best cinematography, best editing, best sound, best screenplay, aser the jury award agütsütsü.

Jury-isa main awards nung madenba films mesüra akok.

individuals nem 'special mentions' agütsütsü tashi lir.

Iba benjung ya THOUNA, Manipur-i Department of Information and Public Relations aser All Manipur Film Producers Association den yaritepa ayongzüker. Benjung nung Ministry of Information and Broadcasting aser National Film Development Corporation-ia teyari agütsür.

Iba benjung nung shilem aginürtemi TanthaPolis Cinema, Lamphel-795010 nung 3rd NEIFF 2026 Cell dangi yoktsü akok.

Manipur nung CRPF-i angati medical camp ayongzüka agi



Imphal, March 10, 2026

(Agencies): Central Reserve Police Force indang 112 Battalion-i 87th Raising Day tenüng nung free medical camp ka ayonga agiogo.

Manipur kübok Kangpokpi district nung meta talang pilar alirtem nem healthcare services agütsü.

CRPF Manipur aser Nagaland Sector kübok E Company, 112 BN CRPF, Gelnel ajanga Lamchok Nepali

Village nung medical camp ayongzüker.

Meta talang pilar aliba yimdaklirtemi basic medical facilities angutsü timtemer aser iba asoshi parnok yaria iba medical camp agiogo.

Iba sentong nung Deputy Commandant Rajendra Prasad Raiger, Assistant Commandant Shivraj Mahualay, Unit Medical Officer Dr. Durgesh Dhote aser T. Waichong Primary Health Centre Medical Officer-in-

Charge Dr. Jangkhogin Kipgen den CRPF o PHC nungi nursing aser paramedical staff aden.

CRPF indang motto "Service and Loyalty" nung ajemdaker iba sentong agi aser IT Road anasa aliba yimtsüngtem nung alir aika adenshia teyari agiogo.

Iba sentong nung Kuki, Naga aser Nepali nunger yimtsüng 15 jungnüa nungi Village chiefs aser Village Authority chairmen aden.

Haiti nung drone agi nisung aika tepsetogo: HRW



Anti-gang operation mapang Haiti security forces-i drone amshia amakba nung asüba nisung ka angur.

Port-au-Prince, Metsüremi/ March 10 (Agencies): Haiti security force temi ozüing alema inyaksangshiba teloktem drone nung bomb alenoker amakba sülen civilian 43 aser tanur 17 densema nisung 1,200 dak tema tepsetogo, ta Human Rights Watch-i Mongolbarnü sangdong ka ajanga metetdaksü.

Taoba küm March ita nungi Haitian security forces aser Vectus Global na longjemer quadcopter drone tem nung bomb alenoker anti-gang operations benoka inyakdar, koba yimya agi linük yimtiba Port-au-Prince nung nisung aika aliba tesem nung benoka inyaker. Vectus Global ya US nunger amendaker aliba company ka lir, koba Blackwater ngutetsang Erik Prince lenisüba nung inyaksangshir.

Haiti Ato Kilonser office, defense minister, national

police, Vectus, aser U.S. State Department nungeri iba dak sendakba nung telangzüba kecha magütsü. Haiti nung U.S. charge d'affaires-i taoba ita Senate committee dang ashiba agi, State Department-i Haiti nung inyaksangshitsü atema Vectus nem license agütsüogo.

HRW indang Americas director, Juanita Goebertus-i Reuters dang, iba rights group yagi ozüing alema tashiyim amshiba mangaoka lir, ta ashiba den, Haiti indang partner temi civilian tem kümzüka ayutsü atema jenjang magi tashi security force tem den longjemer minyaktsüla, ta shisem.

"Tanurtem timba masü tsüingda Haiti nung ketdangsurtemi security force aser parnok atema inyakba private contractor tem azüoktsüla," ta lai ashi.

Kenyan, U.S. aser U.N nungeri teyari agüjaka Haiti nung ozüing alema inyaksangshiba teloktem linük yimtiba adena or tanga tesem nunga inyaksangshi tenzüko, aser security force-i tang tashi lenir tongtibang ka mapu lir. Item teloktem yagi nisung meyirejang aika tepsetogo aser nisung million ka dak tema pei talidak kidang nungi jenshia odaktsüba den rongsenketzüing lemta-a küm daksüogo.

Taoba küm March ita nungi taküm January 21 tashi nung nisung 1,243 tepsetba HRW-i ngutetogo.

Iba mapang nungsa nisung 738 yiruogo, kong civilian 49 densema lir, ta HRW-i ashiba den November ita nungi January its tsüingda drone operation anasü agi timba benoka inyaksangshia liasü, ta shisem.

North Korea-i US-South Korea military exercise aitsü

Seoul, Metsüremi/March 10 (Agencies): North Korea lenir Kim Jong Un tenu Kim Yo Jong-i, East Asia tamendakdak raksatsütsü merangba atema United States aser South Korea na aitsüogo. Linük ana ya tang anogo 10 atema Korean Peninsula nung joint military exercise ka ayongzüka agidar.

"Ozü linük anasa tsükchirtemi tashi sayuba ajanga timtem lendong tulu ataloktsü akok," ta Kim Yo Yong-i Mongolbarnü ashiba state meyong Korean Central News Agency (KCNA)-i metetdaksü.

"Tsükchirtemi onoki arenzüka ataba aser onok tashi metendangtsüla," ta Kim-i ashi.

"Tsükchirtemi koba tashi ozü state indang security anema inyaksangshir aji onoki repranga atatsü," ta laisa shisem.

Joint Freedom Shield exercise Hombarnü tenzüka sülen Kim-i iba olen lemsatepogo. Iba anogo 10 agiba exercise nung South Korea aser US military personnel 18,000-i shilem agitsü.

Military exercise tem ya linük ana longjemer telangzüba balala agütsütsü asoshi inyakyim tashi itshitsü atema lir, ta linük ana yagi metetdaksü.

Taküm Freedom Shield nung field training drill 22 densema alitsü, koba South Korea indang Yonhap News Agency-i ashiba agi, taoba küm dang nungi tesadang agi ishiba lir.

Kim-isa, parnoki item exercise tem kechiba ayongzüka agir aji kuli magütsütetsü, koba parnoki taoba mapang defence atema ta shia aruogo, ta ashi.

South Korea aser North Korea na 1953 küm nungi rara nung lir. Iba küm armistice agreement ajanga rara ya khen atema anendaktsü, saka iba ajanga rara formally metembangdaksü.

North Korea lenir Kim Jong Un-i 2024 küm South Korea den longjemtsü atema joko jenjang magitsü ta shiogo, ajisüaka Seoul nükjidongbo linük ana ya longjemtsüba lir.

South Korea indang Ministry of Unification nungi ketdangsur

kati ashiba agi, Mongolbarnü Kim-i lemsatepba olen ya taoba mapang amabo kanga sashiabo magütsü.

Lai US tetshia mejembi aser nuclear tashi amshitsü atema amokmeren masü, ta ketdangsur yagisa shisem.

Office of the Chuchuyimlang Kaketshir Telongjem Mokochung

KONANG TETUSHI YIMYIM

Tsüngremi mezüja shimetba ozü senso aser takotet kaketshir züingsem tajung, **Sb. Imlikokba Longkumer**, S/o Wb. Meyimongba aser Wt. Moainla, pai tawa sangdongba NPSC CTSE tatidang 2025 nung takok tajung nguteta PHED kübok Sub-Divisional Officer menden ajangzüktet nung asen CKTM nüma tenteter aser Tsüngrem tenüing sanga konang tetushi tulu agütsür. Ne tarakjem shisatsü agi asen nüburtet tenzükdang Tulusang Tsüngremi ne sempet tajung maneni temabai ajungketa moajang ta asen kaketshirtem tamang sarasadem.



Sd/-
Sb. Imsutoshi Pongen
Tir, CKTM

Sd/-
Kr. Sungjemnungla Pongener
Tongti Zülur, CKTM

MAKENCHIBA SEMCHIR UNGMA IMPANG-I TENÜNGSANG AGÜTSÜR



Dr. Imtilemla Jamirtsür, Wb. Rongsennungba Jamir aser Wt.Chubasenla Longkumtsür, tena jala, lai NPSC CTSE 2025 sangdongba nung Veterinary Assistant Surgeon (Class -1 Gazetted) merit No. 1 menden ajangzüktetba asoshi kinungertemi pelaba den la nem konang tetushi tulu agütsür.

Teyanglur Tsüngremi la taküm maneni len ania moajang aser nüburtet tenzükdang wadang nung azükaru lidakjang ta kinunger rangbeni sarasademtsür

Kinunger tenüing nung;

- 1. Wb. Lanunungsang Tatar,
- 2. Wb. Chungpongmeren Tatar,
- 3. Wb. Chungpongsusang Tatar

Office of The Mongsenyimti Metsubo Kidong

Mongsenyimti, Mokochung, Nagaland
PO : Chuchuyimlang , District: Mokochung.

KONANG AGÜTSÜR

Wb.L Imthy Jamir aser Wt.Takamongla na jala **Kr. Sungjemrenla I Jamir**, NPSC tawabangba kübok agiba NPSC-1 CTSE tatidang nung takok tulu ngua Pharmacist jenjang ngutet nung Mongsenyimti Metsubo kidong mendenti ajanga konang tetushi agütsür.

Na koba tesem aser tensa nung lia sorkar tenzükdir tenzükkaka Tsüngrem angateta nüburtet tenzüksü ajungshir.

Sd/-
Imtisang Jamir
President

Sd/-
Shilutemshi Jamir
Secretary



United States aser Israel nati Iran anema amakdang tepsetba nisungtem den asüpila sentong ka Iran yimtiba Tehran kübok Behesht-e Zahra nung agidang nüburtet mangyima ajepba noksa nung angur.

Nagaland Wushu Association jongdak senden ayonger

Kohima, Metsüremi/March 10 (TYO): Taruba Nagaland Olympic aser Paralympic Games 2026 nung Wushu tetoktepba atema renemshitsü asoshi sensak asemstü atema Nagaland Wushu Association (NWA)-i, Emergency General Body Meeting (GBM) ka ayongzükogo.

March 10 nü office sangdong ka ajanga ashiba agi, senden ya March 17 nü anepdang 11 ako nungi tenzuka Kohima nung Nagaland Olympic Association (NOA) office nung amentsü ta

metetdaksüogo.

NWA tir aser MLA & Advisor of CAWD and Taxes, Government Kudecho Khamo-i temelaba agütsüba sülen GBM ya ayongzükogo. Senden ya taruba state-level asayamung nung Wushu tetoktepba ayongzuka asayatsüba dak rangloker agitsü, koba 2026 küm April 17 nü nungi tenzuka asayatsü.

Iba dak sendakba nung unit tir aser general secretary ajak dang senden nung arua adentsü metetdaksüogo. Koda masüba

maparen kar ajanga parnok medentetsüsa kümra parnoki Wushu indang technical shisatsü bena aliba aser association inyakyim jangja aliba ketdangsür tangar kar yoktsü metetdaksüogo.

Taruba asayamung nung Wushu asaya ya kecha tetsükdaksü makai kanga junga ayongzuka asayatsü atema renema atatsü asoshi iba senden nung tamakok maludaksüi arua shilem agitsü asoshi association-i ketdangsürtem dang mepeshia metetdaksüogo.

Oscar Garcia Ajax head coach kümogo



Oscar Garcia

Metsüremi/March 10, 2026

(Agencies): Dutch club Ajax asoyatsü. Taruba itatem ya club asoshi kanga tongtibang lir," ta puri Oscar Garcia coach asütsü shimogo aser Fred Grim tanaben club academy-i meyipa yokogo. November ita John Heitinga mapa nungi anentsüba sülen Grim ya first team-i ajungketja liasü.

"Club atema kechi tajungtiba asütsü ta Fred küna sensaksemogo aser künati temelenshi nüngdaker ta mulungtepogo," ta Ajax indang technical director Jordi Cruyffi-ashi, shiba January ita shima liasü.

Garcia shiba Ajax indang youth team coach nungi tenzükter temaba jenjangi tua liasü, pa England nungi Brighton coach liasü aser Israel nung Maccabi Tel Aviv den league titles aben aser Austria nunga RB Salzburg nung inyakogo.

"Oscar lenisüba nung season nung tanungba asayatem

asoyatsü. Taruba itatem ya club asoshi kanga tongtibang lir," ta Cruyffi-ashi.

Dutch league 36 ben koker aliba team ya küm ishika junga masayateti arudar aser parnoki 2022 küm tesüsa league kokogo. Parnok tang asaya aliba season nunga pongububa nung lir aser tanabuba jenjang nung aliba Feyenoord dang nungi point pongu agi tajemba lir, shirnoki Champions League league phase atema direct qualification jenjang tatembangbuba mekazuka lir.

Amsterdam nung amendaker aliba club ya taoba küm season tatem takoksa tulu ajuruba sülen tang tashi junga meshilangi lir. Taoba season atemtsü asaya pongu anunga lia parnok point teku agi timba liasü saka asaya ana makokba den ana draw asüba sülen PSV Eindhoven nem league kokdaksü.

Afghanistan aser Sri Lanka asayamung thinener

Metsüremi/March 10, 2026

(Agencies): Sri Lanka-i, United Arab Emirates (UAE) nung Afghanistan den limited-overs cricket asayamung ka nung asaya trok asayatsü aliba mapang telatet ka makai thinentüsügo. Middle East nung tang rara adoker aliba ajanga iba jenjang ya agia liasü.

"Tayimtsü senzusenpong nung tetsükdaksü aliba aser Middle East nung tang rara tenzükter aliba ajanga onoki iba asayamung thitsütsüsa aküm," ta Sri Lanka Cricket ketdangsür kati AFP news agency dang ashi.

Team ana ya Sharjah nung March 13, 15 aser 17 nü T20 internationals asem aser iba sülen Dubai nung March 20, 22 aser 25 nü one-day internationals asem asayatsü

liasü.

Iba asayamung ya Afghanistan-i ayongzuka Sri Lanka den asayaba mezüngbuba bilateral series süla.

United States aser Israel nati February 28 nü nungi Iran amak tenzük aser Tehran-ia meyiper linük balala amak tenzükba sülen Middle East nung tang tensa kanga mejungi lir.

Iba rara ajanga Middle East nung Dubai densema tayimtsü nung tetsükdaksü adokogo, kong airport mapang tatsüka atema shibanga liasü, kechiyong Iran-i Gulf nung tesem balala dak drone aser missile tem khalokja liasü.

Afghanistan-i tang tashi nung international cricket asaya ka danga host südanga

mali aser parnok indang home fixture tem India mesüra UAE nung asaya arudar.

Kasa mapang nung T20 World Cup nung kanga kara tsükatokba sülen Sanath Jayasuriya-i coach mapa toktsüogo aser pa melena Sri Lanka taoba mapang South Africa nung Test asayar Gary Kirsten par team coach asütsü shimogo.

Sri Lanka Cricket-i ashiba agi, Kirsten den küm ana atema tenangzüktepba yangluogo aser pa mapa April 15 nü nungi tenzüksü. Jayasuriya den tenangzüktepba yanglur aliba ya June ita tembangtsü liasü.

Kirsten ya taoba mapang 2008 nungi 2011 tashi India coach aser 2011 nungi 2013 tashi South Africa coach liasü.

BCCI-i India cricket team nem senpet sen crore 131 agütsü



Metsüremi/March 10, 2026 (Agencies): T20 World Cup akokba India cricket team nem linük cricket board-i

senpet sen crore 131 agütsütsü nangzükogo, koba asayamung akokba atema senpet agizükba dang nungi

trokben agi timba lir.

Kidang asayaba asayamung nung takok tajung anguba atema alima nung

cricket board takartiba, Board of Control for Cricket in India (BCCI) yagi Mongolbarnü India team nung senpet talila agütsütsü sangdongogo.

BCCI-i agütsüba senpet ya asayamung nung senpet agütsüba USD million 11.25 dang nungi USD million 3 agi timba asütsü.

India team-i otsütsüsa Deobarnü tebur T20 World Cup tasembuba kokogo. Final nung parnoki New Zealand team run 96 agi ayong ayonga akok aser asayamung akokba atema senpet sen lakh 23.4 ngua liasü.

"Iba takok tajung asoshi board-i asayar, support ?staff aser asayar shimertem nem maneni tenüngsang agütsür aser tarutsü nunga maneni takok nguyonga aotsü imlaja atar," ta BCCI sangdong ka ajanga metetdaksü.

Senpet ya caoch aser support staff tem densema

team ajunga alemtsü.

BCCI-i taoba küm Champions Trophy akokba India team nem senpet USD million 6.72 agütsü, koba asayamung akokba atema senpet USD million 2.24 agizükba dang nungi asembe agi timba liasü.

T20 World Cup asembe tashi akokba sülen captain Suryakumar Yadav-i ashiba agi, parnok asoshi tang nükjidong tulutibaji 2028 küm Los Angeles Olympics nung gold medal angutsüba ya lir.

Iba takok anguba ajanga iba format nung India ya ajak dang takok tajungtiba anguba team kümdaksüogo, ta BCCI secretary Devajit Saikia-i ashi.

Alima nung nütünyongtsük timtiba aliba linük nung ya cricket asaya ya kanga nungtugu lir aser asayatem ya temaba jenjang nung tushia amshir.

BILEMDANGANG

"Nai kechi inyakteter aji nendak nendaka inyangang."